

ABDIAS

1 Nyenan Abdias a nga yen.

Avale di nde Tate Jehova a jô ajô Édom, na : Bi wô'ôya mefoé m'aso be Jehova, nalé fe beta nlôman a ne nlôman meyoñ été, a jô na, Kôla'ane si, bi tame kôlô si a wosane nye a bita. 2 Tame yen, me boya wo tyôtyoé meyoñ été : bôte b'adañe biasé wo. 3 Mebune ya nleme wôé me maneya du'u wo, A wo ô nto mimbane mi ako' été, a éto ô to é ne ôyape yôp : nyô a jo nleme wé na, Za a ye sili me si ? 4 A kôsa bo wo w'abete yôp aval ane ndôé, nalé fe a kôsa bo dumba'a dôé d'alôñeban zañ ateté, m'aye sili wo si vôm ate, nalé Jehova a jô.

5 Nge miñwuwup mi to zu be wo, nge mimvômvôle mi to zu alu (ak'a'a tyi'an w'aty'i'iban !) ye mi nga ye bo te wup ve akekui mi yeneya abim d'ayian ? nge bekôane bibuma mindik be to zu be wo, ye be nge ye bo te li'i metôka'a bibuma bi éziñ ? 6 Aka'a njeñan b'ajeñe biôme ya Ésaü ! aka'a njeñan b'ajeñ akume dé é ne nsolan ! 7 Bôte bese ya ngame jôé be maneya litane wo zen, akui nné ôbien : bôt mia be be mi nga to mvo'é be maneya du'u wo, a dañe fe wo ; ba b'adi fembé jôé b'alame wo ôlame si : fe' é nji bo be nye. 8 Jehova a jô na, Ye m'aye bo te jiane beyeme mam mfa'a ya Édom môs ôte, a jiane fe fek mfa'a ya nkôl Ésaü ? 9 Nalé fe biwôlô bi bôte biôé bi aye bo fe'e ne vema ! A Théman, nde te mô't ase a ye tyi'iban mfa'a ya nkôl Ésaü a ñwôan b'awôé nye.

10 Oson vi aye dipe wo, amu évô é nga bobane be monyoñe Jacob, a w'aye tyi'ibane nnôm éto. 11 Môs ô nga tebe mfa'a ya yat, môse ya bejin be nga sa biôm bié , a bôte ya meyoñ mefe be nga nyi'in mimbé mi aka'a mié, a do Jérusalem abia, wo ô nga to avale ane môte wua ya be be. 12 Ve te fombô môse ya monyoñ môs a tôbane bidim, nalé fe te vak a jame ya bone be Juda môse ya b'ajiane be ; nalé fe te kobô mebun môs ya njuk. 13 Te nyin mbé aka'a ya bôte bam môse b'atôban mbia jame wop ; ya, te fombô nju'u wop môs b'atôban mbia jam, nalé fe te saane be biôm môs b'atôbane mbia jame wop. 14 Te tebe fe ma'an mezen, a kômbô wôé ba ya be nye b'atup ; nalé fe te ve bôt bé b'ali'i môse njuk mo me bôte befe.

15 Amu môse ya Jehova ô ne bebé mfa'a ya meyoñ mese : aval ane ô nga bo, aval ete fe d'aye bobane be wo ; mboane wôé w'aye bulan nlô wôé womiene yôp. 16 Amu aval ane mi nga nyu nkôle wom ô ne étyi yôp, aval ete meyoñ mese m'aye nyu melu mese ; ya, m'aye nyu, a min, a bo aval ane nge me nji ke tame bo.

17 Ve mfa'a ya nkôle Sion ba b'anyiñ b'aye bo, a w'aye bo étyi ; a nda bôte Jacob j'aye bi biôm be nga bili. 18 Nde nda bôte Jacob j'aye bo nduan, a nda bôte Joseph j'aye bo nkaba'a, a nda bôt Ésaü ke bikum bi nlisi, nalé b'aye yôñe zañe jap, a di'i be ; a jôm j'aye fe beta li'i nda bôt Ésaü ; amu Jehova a kobôya de. 19 Ba ya sud b'aye bi nkôl Ésaü, a ba ya nje'ese b'aye bi Bephilistin ; a b'aye bi afupe ya Éphraïm , a afupe ya Samarie ; a Benjamin a ye bi Galaad. 20 Nde mikôme ya beta nsamba ya bone be Israël nyô, mi to Becananéen zañ, mi aye bi si éte akui Serepta ; a mikôme ya Jérusalem, mi ne Sepharad, mi aye bi minlam ya Sud. 21 Benyii bôt b'aye bet nkôle Sion yôp a tyi'i nkôle Ésaü mejô ; a njôan w'aye bo jôme Jehova.